

MEMORANDWM CYDSYNIAD DEDDFWRIAETHOL

Bil Lles Anifeiliaid (Dedfrydu)

1. Gosodir y Memorandwm Cydsyniad Deddfwriaethol hwn o dan Reol Sefydlog ("RhS") 29.2. Mae Rheol 29 yn rhagnodi bod yn rhaid gosod Memorandwm Cydsyniad Deddfwriaethol, ac y gellir cyflwyno Cynnig Cydsyniad Deddfwriaethol, gerbron Senedd Cymru os yw Bil gan Senedd y DU yn gwneud darpariaeth mewn perthynas â Chymru at unrhyw ddiben sy'n addasu cymhwysedd deddfwriaethol Senedd Cymru neu sydd o fewn y cymhwysedd hwnnw.
2. Cyflwynwyd y Bil Lles Anifeiliaid (Dedfrydu) ger bron Tŷ'r Cyffredin ar 5 Chwefror 2020. Fe welwch y Bil yn: <https://services.parliament.uk/Bills/2019-20/animalwelfare/sentencing/documents.html>
3. Cyflwynwyd bil tebyg, y Bil Lles Anifeiliaid (Dedfrydu a Chydnabod Dedfrydu), ger bron Senedd y DU ym mis Mehefin 2019 ond disgynnodd yn sgil addoedi'r Senedd ar 8 Hydref 2019. Cyflwynwyd y Bil unwaith eto ar 15 Hydref 2019, ond disgynnodd y Bil hwnnw hefyd pan alwyd Etholiad Cyffredinol mis Rhagfyr 2019.
4. Mae'r Bil Lles Anifeiliaid (Dedfrydu) yn Fil Aelod Preifat a gefnogir gan Lywodraeth y DU ac a noddir gan Chris Loder AS. Mae hanfodion y Bil yn union yr un peth â'r Bil Lles Anifeiliaid (Dedfrydu a Chydnabod Dedfrydu), y gosodwyd Memorandwm Cydsyniad Deddfwriaethol ar ei gyfer ar 19 Gorffennaf 2019.

Amcan(ion) y Polisi

5. Amcan datganedig y polisi yw cynyddu'r gosb uchaf am droseddau penodol sy'n ymwneud â chreulondeb i anifeiliaid o chwe mis i bum mlynedd o garchar.

Crynodeb o'r Bil

6. Mae'r Bil yn cynyddu'r gosb uchaf am droseddau penodol sy'n ymwneud â lles anifeiliaid yng Nghymru a Lloegr. Mae'n gwneud hynny drwy estyn y gosb uchaf bresennol, a bennir yn adran 32 o'r Ddeddf, o chwe mis a/neu ddirwy ddirerfyn i gosb o bum mlynedd a/neu ddirwy ddirerfyn. Bydd y troseddau hyn felly yn brofadwy, a gellir eu clywed yn Llys yr Ynadon neu yn Llys y Goron.
7. Cyhoeddwyd y cymalau drafft yn y Bil hwn gan Lywodraeth y DU at ddiben ymgynghoriad cyhoeddus ar 12 Rhagfyr 2017 fel rhan o'r Bil Lles Anifeiliaid (Dedfrydu a Chydnabod Dedfrydu). Daeth yr ymgynghoriad i ben ar 31 Ionawr 2018 a chyhoeddwyd crynodeb o'r ddogfen ymatebion ar 7 Awst 2018. Derbyniodd Adran yr Amgylchedd, Bwyd a Materion Gwledig

(DEFRA) 9,084 o ymatebion uniongyrchol i'r ymgynghoriad. Roedd 70 y cant o'r ymatebwyr yn cytuno â'r cosbau uchaf newydd. Yn y crynodeb o'r ddogfen ymatebion, ymrwymodd Llywodraeth y DU i gyflwyno'r cymalau dedfrydu mewn Bil ar wahân.

Darpariaethau'r Bil y mae angen cydsyniad arnynt

Cymal 1: Dull y Treial a'r Gosb Uchaf am Droseddau Penodol sy'n ymwneud â Lles Anifeiliaid

8. Mae Adran 32(1) o Ddeddf Lles Anifeiliaid 2006 yn darparu mai 51 wythnos o garchar a/neu ddirwy ddiderfyn fydd y gosb uchaf am droseddau penodedig penodol.
9. Yn ymarferol, mae'r gosb uchaf wedi'i chapio i 6 mis a/neu ddirwy ddiderfyn. Y rheswm am hyn yw am fod adran 32(5) o Ddeddf Lles Anifeiliaid 2006 yn nodi, ar gyfer pob trosedd a gyflawnwyd cyn cychwyn adran 281(5) o Ddeddf Cyfiawnder Troseddol 2003, y dylid darllen y cyfeiriad at 51 wythnos o garchar fel cyfeiriad at 6 mis o garchar. Hyd yma, nid yw adran 281(5) wedi ei chychwyn.
10. Mae Cymal 1 o'r Bil yn ceisio diwygio Deddf Lles Anifeiliaid 2006 er mwyn newid uchafswm y gosb am y troseddau canlynol yn unig:
 - a. peri dioddefaint diangen (adran 4);
 - b. cynnal anffurfiad nad yw'n esempt (adran 5);
 - c. tocio cynffon ci ac eithrio pan ganiateir hynny (adran 6(1) a 6(2));
 - d. rhoi gwenwyn i anifail (adran 7); a
 - e. bod yn gysylltiedig mewn ymladdfa anifeiliaid (adran 8).
11. Cedwir y gosb uchaf bresennol, a amlinellir uchod, os caiff y troseddwr euogfarniad ddiannod. Fodd bynnag, gall troseddwr sydd wedi'u cael yn euog mewn treial trwy ddiad gosb uwch o hyd at 5 mlynedd o garchar a/neu ddirwy ddiderfyn.
12. Nid oes gan Lysoedd Ynadon y pŵer i roi cosb o fwy na chwe mis. Roedd Adran 154(1) o Ddeddf Cyfiawnder Troseddol 2003 yn cynyddu uchafswm y ddedfryd o garchar y gallai llys ynadon ei rhoi i 12 mis. Caiff adran 154(1) ei diddymu gan Ddeddf Dedfrydu 2020 ond mae darpariaeth gyfatebol wedi'i chynnwys ym mharagraff 24(2) o Atodlen 22 i Ddeddf 2020. Bydd adran 32(4A) o Ddeddf Lles Anifeiliaid 2006 a fewnosodir gan gymal 1(3) o'r Bil yn sicrhau bod y cosbau priodol ar gael i lysoedd ynadon hyd nes y bydd y darpariaethau perthnasol yn cychwyn.

Cymal 2: Cwmpas, Cychwyn a Theitl Byr

13. Mae Cymal 2 o'r Bil yn darparu i'r Bil gwmpasu Cymru a Lloegr ac y daw'r Bil i rym ddeufis ar ôl cael Cydsyniad Brenhinol. Mae'r cymal hwn yn nodi nad yw'r diwygiadau hyn yn gymwys i droseddau a gyflawnwyd cyn i ddarpariaethau'r Bil ddod i rym. Mae'r cymal hefyd yn pennu teitl byr y Bil.
14. Mae angen cydsyniad ar gyfer y darpariaethau yng Nghymalau 1 a 2 o'r Bil am eu bod yn dod o fewn cymhwysedd deddfwriaethol Senedd Cymru ac nad ydynt yn ymwneud â materion a gadwyd yn ôl yn Atodlen 7A i Ddeddf Llywodraeth Cymru 2006 am eu bod yn ymwneud ag iechyd a lles anifeiliaid.

Rhesymau dros wneud y darpariaethau hyn ar gyfer Cymru yn y Bil Lles Anifeiliaid (Dedfrydu)

15. Mae lles anifeiliaid yn flaenoriaeth i Lywodraeth Cymru a barn Llywodraeth Cymru yw ei bod yn briodol ymdrin â'r darpariaethau hyn yn y Bil DU hwn am resymau amseru a chydlynu. Mae darpariaethau'r Bil yn cyd-fynd ag amcanion polisi Llywodraeth Cymru o ran hybu lles anifeiliaid. Bydd bwrw ymlaen â hwy yn y Bil DU hwn yn golygu y gellir cosbi'r troseddau creulondeb mwyaf difrifol a gyflawnir i anifeiliaid yng Nghymru ar yr un lefel â'r rhai yn Lloegr.

Goblygiadau ariannol

16. Nid oes goblygiadau ariannol uniongyrchol i Lywodraeth Cymru na Senedd Cymru o ganlyniad i'r Bil hwn.

Casgliad

17. Barn Llywodraeth Cymru yw ei bod yn briodol delio â'r darpariaethau hyn yn y Bil DU hwn gan y byddai'n sicrhau bod trefn dedfrydu gyson yng Nghymru a Lloegr ac y byddai'n rhoi eglurder i'r asiantaethau gorfodi, y Llysoedd ac i'r cyhoedd.

Lesley Griffiths AC
Gweinidog yr Amgylchedd, Ynni a Materion Gwledig
Chwefror 2021